

龍津黃柱臣先生鑒定

醫國學子輯要

藥性分類附



光緒庚子仲春許灣

舊學山房較對刊行



醫學輯要黃序

天地之大德曰生醫也者體天地生人之心以爲心
輔相其不足裁成其有餘是乃所謂仁術也而世之
誤用其術者則不惟無以生人而反至於殺人非其
心之忍而出此也其才不足以識陰陽之變其學不
足以窺造化之微而其弊遂至於殺人而不自覺道
之所以不明不行也醫顧可以易言哉遯園先生隱

君子也學本家傳道由心悟連不得志於有司遂以
醫名予前於友人處見其寓意草註釋一帙發揮宗
旨實爲喻氏功臣私心竊嚮往之及司鐸盱南獲與
過從出示近著醫學八卷鉤元勒要觸類旁通然後
知向之私心傾慕者不過窺豹一斑也展讀數過擷
靈素之精英備傷寒之綱領辨脈證之異同便記誦
而爲歌括資考訂則有補遺而其足以發前人未及

之蘊開後學方便之門者尤在藥性分類一編或以
氣或以味或以性質或以功能或相因而不至相蔽
或相得而不妨相同心苦分明無不諦當因以嘆士
之克自樹立能爲斯民所託命者匪獨志慮專壹精
神強固已也而天又必假之以寬閒之歲月俾以老
其才而遂其學且有以遂其濟世之初心豈科名時
命所得而限之哉而遯園亦可自慰矣予於此道

毫無窺見而遯叟謬爲引重殆相契於形骸之外者
耶爰不辭固陋而爲之序

光緒二十六年春三月龍津黃樹楠拜譔



醫學輯要自序

上古醫學之宗肇自岐黃藥性之辨昉自神農降及
後世羣賢繼起箋註源流自成一說者幾數百家窮
鄉僻學之士安所適從哉沿考諸家著述就予所見
遠則張劉李朱四大名家卓然不朽近則喻薛程陸
諸家而已至於本草藥性李瀕湖不憚煩勞廣收博
採仿形圖象撰爲綱目綜計藥名一千八百有奇分

門二十餘部備查既繁考究尤艱汪軻庵刪繁就簡
十取其二計三百數十種顏曰本草備要似爲簡便
之書然僅分山川草木土石數部究於擬方選用之
時如披沙揀金令人艱於翻閱匪獨予懷莫釋抑亦
同道之士每多扼腕也歲壬辰值舍弟幼盟由京回
梓過余言曰宦京數載公餘多暇喜讀醫書博觀約
取然後知識病難而辨藥尤難竊欲於本草藥性中

別其性味相同相因而相宜者彙爲一類以便取用
因循未果吾兄其有意乎予韙其言爰將本草藥性
甘苦寒熱按部分類集爲一卷並首集內經纂要傷
寒問答證治脈論末附醫方括解集古補遺共計八
卷經營兩載始告成功忝以醫學集要名之俾閱者
一目瞭然聊爲醫學臨症之助且以酬舍弟幼盟之
意云是爲序光緒二十六年仲春盱南謝甘澍遜園

醫集

卷下

氏謹識於麻姑山之蘭若軒時年七十有八

醫學輯要例言

一是書集訂八卷首集內經纂要宣明人身藏府

陰陽經絡五行生剋之理以爲醫學入門俾知

人身之病有由不善調攝自內而生者有由外

感風寒入內爲患者治法當分內外以爲用藥

準繩不得概從傷寒門類混治如儒學入門四

書五經通曉後乃知文理章法井然不可紊亂

然則內經一書豈有漫不經心而可言醫哉予
仰承庭訓爰將經旨策其大要集於卷首爲後
學津梁回憶當年入門之艱以明醫雖小道未
可一蹴而幾繼集素問靈樞篇中所論病機常
變悉本人身自召古人所以連類識之使後人
知其源頭不得頭痛醫頭腳痛醫腳以致遺殃
留患喻嘉言先生著醫門法律所謂醫之罪者

此也

一是書第二卷集傷寒門類殷繁紛緒之中提出綱領旨趣以爲總治傷寒主腦而後分疏註辨其中緒論分晰針線到底不淆使後學易於了曉此蓋程鍾齡先生畢生精力其寢饋長沙之功誠非日月所可計者茲余謹集於首卷內經之後亦欲後學循途而進毋虧一簣之功庶幾

斯道復明也

一是書第三卷集傷寒答問之篇其中一問一答
傾口而出瞭如指掌一詞一語毫不離宗悉本
仲景傷寒註疏得來必使病情與經旨相合而
後答之不誣舉方必與病實相因而後投之克
當此其學仲景之學心仲景之心而不讓仲景
專美於前者矣他如柯韻伯著來蘇集尤在涇

著貫珠集吳又可著溫疫論及修園金匱要略
等書未可殫述然綜觀其旨都不外仲景範圍
茲余所謂集要者皆從實學工夫按部就班欲
爲後學登高自卑之一助若夫診脈一道書云
望聞問切卽爲神聖工巧夫望而知之謂之神
聞而知之謂之聖問而知之謂之工切而知之
謂之巧巧也者閉目凝神靜心思索始足以售

其巧切之又何難乎然則以切爲難者特未之
思也試觀人之休視而視愈明返聽而聽愈聰
亦可爲診脈之一助茲卷從內經診候並論集
於前以明診之不獨乎脈而必兼候病證而後
已所以上古聖人論脈從簡墨不多著厥後名
賢應運而起類狀脈象詩言歌詠不一而足無
非以浮沈遲數四字爲綱衍出二十八字爲領

描影畫形極盡其狀均足嘉惠來學吾願業斯道者引伸其義毋自畫焉

一 是書第四卷全集藥性分類以便易於查考蓋統本草備要一書所載數百種藥內選出同性同氣同味相因之品彙爲一類共分十有八門如鄉試扁門之前必須標牌記名分清某府某縣俾堂上點名領卷不致紊淆庶使甘苦濃淡